

Cun chanzuns cunter sida

■ (anr/grc) Notschtröm, Pobufibanox, AndaRojo, Simona Caminada, The Capoonz und Mario Pacchioli, quai èn ils numds dals sis elegids da la concorrenza musicala «amar la vita». Sin ils protagonistas spetgan uss registraziuns professiunalas en il studio. «amar la vita» – uschia sa numna la concorrenza che l'Agid cunter sida (sindrom d'immunitad defizienta acquistada), (Aids), dal chantun Grischun ha lantschà avant in mez onn. Tschertgadas eran chanzuns rumantschas modernas davart dal tema amur, sexualitad e sida. Or da las bleras inoltraziuns èsi stà da tscherner ils sis megliers titels. La funcziun da giuria han gì ils auditurs e las auditoras dal Radio Rumantsch, tiers quai è vegnì in giudicat competent tras in gremi neutral. Decisivas èn stadadas las 3083 vuschs che l'auditori ha dà cun il «voting» sin la rait da l'internet. Ier saira èn vegnidas

preschentadas las sis chanzuns victuras al Teater da la citad da Cuira: «Deliberada» dals Notschtröm, «Buc a ti» dals Pobufibanox, «Viva» dals AndaRojo, «Daco» da Simona Caminada, «Mo per tei» da The Capoonz e «Sut la pial» da Mario Pacchioli. Atgnamain nun haja dà ina victura u in victur, mabain sis tals, ils numnads.

Sco auditura u auditor ha i quasi fatg mal tadlond la melodia dals Jauers da la Val Müstair da la gruppa «Ils Lumpaz cun la chanzun 'Chüra ta vita'» che nun è vegnida eligida sco in dals sis megliers titels.

Disc cumpact planisà

Intgins dals elegids èn gia «habitués» da la scena, auters èn dentant veritablas scuvertas. Els tuts ston uss anc sa metter vidlonder per da vaira; i spetga in'intensiva lavur da studio. Qua sto anc vegnir glimà vi dal «groove» e vi da

la dinamica, qua ston ins magari anc raffinar rimas e tuns. Ed alura èn ils songs pronts per il disc planisà.

Jan Boner, manader dal project e collavuratur Agid cunter sida dal Grischun, è persvas: «Grazia al grond engaschi da las gruppas da musica vegnin nus a preschentar il 2008 sis 'top-songs' d'emprima qualitad.»

Cun agid da la promoziun dal project cunter la sida da «Aids-Hilfe Graubünden» «amar la vita» en collavuraziun cun Radio e Televisiun Rumantscha (rtr) cun musica moderna rumantscha saja i gartegià exemplaricamain da promover la prevenziun cunter la sida, èn ils responsabels persvads.

Il project sco tal

A musicistas ed a musicists da la regiun retorumscha èsi vegnì dà l'incumbensa da crear producciuns, numnadamain chanzuns pertutgant il tema «love life», amar la vita, atgnamain ina campagna da l'Uffizi federal da sanitad publica (UFSP) da la secziun sida Svizra. Cun quai prestian las musicistas ed ils musicists ina essenziala contribuziun davart l'identitad culturala e linguistica dal Grischun da lieunga rumantscha, èsi vegnì fatg a savair.

Ils 3 d'avrigl 1987 è stada la radunanza da fundaziun dad «Aids-Hilfe Graubünden» en il buffet da la staziun a Cuira. La midada da «STOP AIDS» tar «love life» pretendeva la discussiun actuala cun la generaziun giuvna. A partir dals 1983 èn en Svizra 5696 personas mortas per motivs da sida, sco quai che la statistica demussa.



Er Mario Pacchioli è stà in dals undrads.

FOTOS G. R. CANTIENI



Musicistas e musicists, chantaduras e chantadurs da las chanzuns premiadas dal project Agid cunter sida.